



## **Thailand rakam penghargaan usaha Malaysia bantu selamatkan rakyatnya di Gaza - Anwar**

Oleh M Hifzuddin Ikhsan - November 27, 2023 @ 8:27pm

hifzuddin@bh.com.my

BUKIT KAYU HITAM: Datuk Seri Anwar Ibrahim berkata, Kerajaan Thailand merakamkan ucapan penghargaan atas usaha Malaysia membantu menyelamatkan warga negara itu yang berada di kawasan konflik di Gaza, Palestin.

Beliau memaklumkan, penghargaan itu disampaikan Perdana Menteri Thailand, Srettha Thavisin, dalam pertemuan mereka ketika lawatan kerja sehari Anwar ke Sadao, Thailand, hari ini.

Perdana Menteri berkata, dalam kejadian itu, Malaysia hanya melakukan yang terbaik berdasarkan kemampuan dimiliki, bagi membantu warga Thailand terbabit keluar ke kawasan selamat.

"Perdana Menteri, Srettha mengucapkan terima kasih khas kepada kita kerana bantuan kita sedayanya untuk menyelamatkan tawanan orang Thailand yang di bawah penguasaan Hamas.

"Saya kata, kita hanya cuba setakat kemampuan kita, tetapi kebijaksanaan Hamas dan Mesir yang memberikan laluan kepada mereka," katanya pada sidang media di Kompleks Imigresen, Kastam, Kuarantin dan Keselamatan (ICQS) Bukit Kayu Hitam, di sini, hari ini.

Terdahulu, Bangkok Post melaporkan tiga rakyat Thailand yang menjadi tawanan Hamas di Gaza, berjaya dibebaskan hasil bantuan Malaysia, baru-baru ini, menjadikan keseluruhan tawanan warga Thailand yang diselamatkan mencecah 17 orang.